

農政全書卷之五十

上海徐光啓原本

上海太原氏重刊

明


東陽張國維
穀城方岳貢
原刻

荒政採周憲王救荒本草

草部 葉可食

花

蒿



花蒿 生荒野中，苗葉就地叢生，葉長三四寸，四散分垂，葉似獨掃葉而長硬，其頭頗齊，微有毛澁，味微辛。

救飢 採葉燂熟，水浸淘淨，油鹽調食。


兔兒傘



兔兒傘 生滎陽塔兒山荒野中，其苗高二三尺許，
每科初生一莖，莖端生葉，一層有七八葉，每葉分作
四叉，排生如傘蓋狀，故以爲名，後於葉間擲生莖，又
上開淡紅白花，根似牛膝而疎短，味苦微辛，

救飢 採嫩葉，燂熟，換水浸淘去苦味，油鹽調食，

地 花 菜



地花菜 又名墓頭灰，生密縣山野中，苗高尺餘，葉似野菊花，葉而窄細，又似鼠尾草，葉亦瘦細，稍葉間開五瓣小黃花，其葉味微苦。

救飢 採葉煤熟，水浸淘洗淨，油鹽調食。


杓 兒 菜



杓兒菜 生密縣山野中，苗高一二尺，葉類狗掉尾，葉而窄頗長，黑綠色，微有毛澁，又似耐驚菜，葉而小軟薄，稍葉更小，開碎瓣淡黃白花，其葉味苦。

救飢 採葉燂熟，水浸去苦味，淘洗淨，油鹽調食。

佛 指 甲



佛指甲 生密縣山谷中、科苗高一二尺、莖微帶赤黃色、其葉淡綠、背皆微帶白色、葉如長匙頭樣似黑豆葉而微寬、又似鶩兒腸葉甚大、皆兩葉對生、開黃花、結實形如連翹微小、中有黑子、小如粟粒、其葉味甜、

救飢 採嫩葉、煤熟、換水淘洗淨、油鹽調食、


虎尾草



虎尾草 生密縣山谷中、科苗高二三尺、莖圓葉頗似柳葉而瘦短、又似兔兒尾葉亦瘦窄、又似黃精葉頗軟、搯莖攢生、味甜微澁、

救飢 採苗葉燂熟、換水淘去澁味、油鹽調食、

野 蜀 葵



野蜀葵 生荒野中，就地叢生，苗高五寸許，葉似葛
勒子秧葉而厚大，又似地牡丹葉，味辣。

救飢 採嫩葉，燂熟，水浸淘淨，油鹽調食。

蛇 葡 萄



蛇葡萄 生荒野中，拖蔓而生，葉似菊葉而小，花叉

繁碎，又似前胡葉亦細，莖葉間開五瓣小銀褐色花，結子如豌豆大，生青，熟則紅色，苗葉味甜。

救飢 採葉燂熟，換水浸淘淨，油鹽調食。